



Protocol

dalla seduta dil cussegl da vischnaunca,
venderdis, ils 11 da mars 2016, allas 20¹⁵- 22⁵⁷
en casa communal

Presidi: Livio Zanetti

Actuar: Ervin Maissen

Presents:

a) Cussegl

Christoph Berger	Jordana Lozza-Desax
Armin Berther	Armin Manetsch
Adrian Bigliel	Flavio Murer
Silvio Candinas	Adrian Pally
Adrian Deflorin	Alfred Spescha
Edgar Durschei	Livio Zanetti
Rita Huonder-Tenner	Rico Tuor
Wendelin Jacomet	

Cussegliaer Flavio Murer, muort survetsch militar cun retard.

b) Suprastonza communal

Francesg Cajacob	Roger Tuor
Cecilia Maissen-Desax	Iso Mazzetta

c) Referent

Marcus Weber, president cussegl d'administraziun Pendicularas Mustér SA

d) Perstgisas

Madlen Deflorin-Spescha

e) Hosps

16

“Questa sera vegnin nus a tractar diversas tematicas. Ina tractanda ei la lescha ed il regulativ da taxas per igl allontanament e la purificaziun dallas auas. Las entradas da quella sparta sesanflan gia dapi onns en in disequilibrer cun las expensas. Las entradas stuessen cuvieren las expensas annualas e dar la pusseivladad dad crear certas reservas per renovaziuns ed investiziuns. Negin da nus paga bugen dapli. Tuttina pretenda ei cheu in saun giudezi per far ina midada dallas taxas.

In pass el futur ei il remplazzament dall’illuminaziun publica cun tecnologia nova. Il respargn d’energia vegn segiramein a semussar. Quei ei in dils numerus pass, che nus stuein aunc far per renovar noss’infrastructura. Era tiel remplazzament e la renovaziun dall’infrastructura eis ei impurtont da buca mo remplazzar in tal indrez cun la medema tecnica, malgrad la situaziun stretga finanziaria eis ei impurtont da far in pass anavon e da remplazzar quella cun tecnica moderna adequata al temps.

Egl emprem plaid da quest onn haiel discurreu d’in jocher. Dil jocher da Mustér, d’ina persuna cun grond idealissem, d’ina persuna cun grond engaschi personal per nossa regiun e nossa sparta turistica.

Duront la discussiun dalla tractanda davart il rempar Ual d’Acletta eis ei semussau, ch’ei fuss bien sch’il cussegl da vischnaunca havess la pusseivladad da s’informat pli profund davart la situaziun actuala dil project Resort Catrina e da tschentar damondas agl investur, signur Marcus Weber. La suprastanza communal sco executiva ha declarau claramain, ch’ella less contrahar e discussiunar cun las Penderas da Mustér davart las participaziuns dalla vischnaunca. L’emprema discussiun vegn ad esser quella sur dallas mesiras da protecziun pil resort e pli tard segiramein era davart ulteriuras participaziuns dalla vischnaunca.

Muort quellus ponderaziuns ei signur Marcus Weber vegnius envidaus alla seduta da questa sera. Jeu engraziell a signur Marcus Weber ch’el ha dau suatientscha a quei invit e ch’el ei sedeclarau promts d’informat nus sur dils projects planisai sco era da rispunder silsuenter nossas damondas.

Prender decisiuns pil futur ei buca adina sempel. Jeu selubeschel da citar il filosof grec Aristoteles:

~~“Wir können den Wind nicht ändern, aber wir können die Segel richtig setzen~~ Nus savein buca midar ils vents, nus savein denton posiziunar endretg la vela”.

Grond plascher hai jeu da comunicar dapi la davosa seduta dil cussegl da vischnaunca la naschientscha da Salomo Giger, naschius ils 29 da fevver 2016, fegl da Flavio e Rosangela Giger-Klais a Buretsch.

Cordial beinvegni ed als loschs geniturs nossa cordiala gratulaziun.

Cunquei arvel jeu la 30 avla seduta dil cussegl da vischnaunca."

Tractandas:

Cusseglia Wendelin Jacomet

Proposta da tractandar la fatschenta “projects communal: informaziun prioritaziun e finanziaziun” sut tractanda 2.

Decisiun

Cun 14 encunter 0 vuschs approbescha il cussegl da vischnaunca la gliesta da tractandas che secloma:

1. Marcus Weber: Informaziun projects Resort Catrina e Pendicularas Mustér
2. Projects communals: Informaziun priorisaziun e finanziaziun
3. Revisiun parziala dalla lescha davart igl allontanament e la purificaziun dallas auas e dil regulativ da taxas (messadi nr. 39-2013/2016)
4. Remplazzament dall'illuminaziun publica: Credit (messadi nr. 40-2013/2016)
5. Ura da damondas (conform ad art. 44 dil regulativ da fatschentas)

Cussegl da vischnaunca Disentis/Mustér
Il president: Igl actuar:

Livio Zanetti

Ervin Maissen



1. Marcus Weber: Informaziun projects Resort Catrina e Pendicularas Mustér

Marcus Weber

Las Pendicularas Mustér sentan eclatantamein la digren dallas pernottaziuns. Allas Pendicularas maunca mintg'onn in cash-flow da rodund frs. 1'000'000.--. Quellas entradas mauncan per far las investiziuns necessarias. Ils novs investurs han ponderau seriusamein quella situaziun cura ch'els han surpriu las Pendicularas resp. co igl ei pusseivel d'augmentar las frequenzas e cheutras las entradas. Mustér ei buca ina destinaziun adattada pil turissem dil di. Fieras pil turissem dil di per Mustér ein il Tessin e l'Italia dil nord. En las ulteriuras direcziuns dat ei autras destinaziuns pli maneivlas. Las Pendicularas han sviluppuau treis projects che duein augmentar las frequenzas e l'attractivitat. Igl ei quei il niev Resort Catrina a Sontga Catrina che duei generar in augment dallas pernottaziuns. La pendiculara da Valtgeva sur Cungieri viers il cuolm da Vi duei activar il contuorn da Cungieri e possibilitar la colligiaziun cun Sedrun. El territori da Parlets ei previu in runal per entscheviders, segirs da neiv, Plinavon duei cun quella pendiculara vegnir augmentau la purschida pil turissem da stad. Il hosp duei saver guder il frestg dils aults e turnar anavos sin differentas sendas senza stuer far diever dalla medema pendiculara. Il tierz project, il project da far neiv, duei garantir ina bun'entschatta ella sesiun d'unviern. Cheu vegn ei aunc ad esser necessari da menar in pli liung cumbat cun las organisaziuns pigl ambient.

Mustér ei e duei restar ina destinaziun per famiglias cun purschidas favoreivlas semegliant alla purschida dalla Reka. Negin destinaziun da luxus. Il grond diember da letgs eifer il resort pretendia era l'infrastructura necessaria en la proxima vischinonza, sco stizun da victualias, purschida per urdeins da sport ed ina purschida gastronomica. Cun quellas finamiras ha igl architect sviluppuau in project. L'intenziun era d'entscheiver gia uonn cun la realisaziun dil resort da vacanzas. La situaziun cugl Ual d'Acletta mo era l'entira procedura en connex cun la planisaziun locala freneschana la dinamica dil project. Il cantun Grischun para d'esser in cantun cun in'administraziun pli burocratica che quella d'auters cantuns. Igl ei previu d'inoltrar la damonda da baghegiar entochen la fin dil meins mars.

Il project inoltraus risguarda la situaziun cun las mesiras da protecziun encunter aua gronda ella Val Acletta tenor il studi da variantas. Vegnessen quellas mesiras buca realisadas, stuess il resort vegnir alzaus per 1.5 entochen 2.00 meters ord la tiara cun las mesiras da protecziun necessarias. Quella sligiaziun fuss denton muort il pli pign volumen da scavament pli favoreivla per la realisaziun dil resort. Denton secumporta quella sligiaziun mal cul maletg dalla cuntrada. Ina surbaghegiada da quei gener duei, sper la creaziun da pernottaziuns e plazzas da lavur, era secumportar cul maletg dil liug. Da risguardar ei en quei connex era la differenza d'altezia da rodund 12 meters d'in cantun a l'auter. Quella differenza da nivel pretendia ulteriura atenziun davart igl architect.

Il resort preveda la realisaziun da 142 unitads da habitar ed ulteriuramein stanzas en fuorma da hostel. Igl intent ei da saver porscher ina purschida inclusiva da frs. 100.-- per di. En duas casas eis ei previu da realisar habitaziuns a favur da personas cun impediments.

Mustér concurrenzscha buca cun ses vischins particulars. Mustér concurrenzscha cugl entir mund. Dapertut sil mund dat ei oz purschidas semegliantas. Mustér ei

attractivis igl unviern, dispona denton era d'ina vasta e fetg biala cuntrada che vegn nezegiada mal la stad. Cul Parc Adula fuss ei pusseivel d'augmentar quell'attractivitat dall'entira regiun e cheutras era da Mustér. Per saver occupar bein las Pendicularas eis ei necessari da crear 700 letgs supplementars. Igl investur tscherca era collaboraziuns cun ils ulteriurs menaschis gastronomic da Mustér. Ils hosps dil resort duein era far diever dallas ulteriuras purschidas el vitg.

Il project per la pendiculara naven da Sedrun ei sviluppaus aschi lunsch, che quel savess vegnir inoltraus per la damonda da concessiun. Denton spetgan ins sin la decisiun dalla vischnaunca da Tujetsch. Cun quella pendiculara fuss ei pusseivel d'activar l'anteriura ustria da Cungieri cun ca. 100 plazs da restauraziun e kiosk. Quella pendiculara augmentass considerablamein la purschida turistica da stad. Denton duei quei project vegnir realisaus en buna accoglientscha cun las autoritads e la populaziun.

Las Pendicularas han generau sur Nadal e Daniev 2015/2016 ina sperdita dad da 1.2 milliuns francs. Sper quella sperdita han 30 persunas buca saviu vegnir occupadas d'ora d'ora. Entochen oz han las Pendicularas da Mustér saviu requirir sezzas ils mieds finansials per las investiziuns. Il davos eis ei en consequenza dallas sperditas da pernottaziuns buca stau pusseivel da recaltgar mieds per investiziuns novas. Las entradas han denton lubiu da tener sidretg il menaschi. Ils indrezs da far neiv ein ina part necessaria per garantir el futur il menaschi dallas Pendicularas. La realisaziun da quels stabiliments vegn aunc a caschunar in dir cumbat cun las organizaziuns pigl ambient. Las Pendicularas sezzas ein interessadas vid in bien svilup ecologic. La finala ei ina biala cuntrada e natira il capital per in bien svilup turistic. Las pretendiuns dallas organizaziuns per la protecziun digl ambient astgan buca menar aschi lunsch, ch'ina existenza per la populaziun indigena ei buca pli pusseviva.

Il conclus dalla populaziun en connex cun la revisiun parziala dalla planisaziun locala muossa che la populaziun sustegn ils projects sin rucca. Per haver success eis ei necessari da cuntinuar ed investir el futur. La Pendicularas vulan cun lur investiziuns tschentar il fundament per in prospereivel avegnir ils proxims 20 onns e cunquei era in bien svilup pils ulteriurs menaschis a Mustér.

Discussiun

Cussegl da vischnaunca

Ei semuossa ch'ei selai aunc adina realisar enzatgei sch'ins ei promts da s'engaschar persunter. Gia igl onn 2011 ha il cussegl da vischnaunca sutlingiau ina megliera cooperaziun regiunala. Sper las investiziuns previdas pudess il Parc Adula evtl. era reactivar in svilup positiv. Las pretendiuns dallas organizaziuns pigl ambient astgan buca menar aschi lunsch, che nus astgein buca pli nezegiar nossa cuntrada.

Ei dat senz'auter era sinergias che san vegnir nezegiadas denter il resort ed il parc. Ils interess ein buca cuntradicteris. Il parc ei in instrument per promover il liug ed ils products enteifer nossa regiun. Il resort ei in segment dil parc. La finala fuss quei resort il sulet che sesanfluss en in parc.

Era il cash-flow dalla vischnaunca dispona buca dalla dimensiun giavischada per saver far las investiziuns giavischadas. Co sepresentan ils giavischs finansials enviers la vischnaunca? Vegnan las investiziuns el resort colligiadas cun obligaziuns enviers la vischnaunca en connex culs indrezs da far neiv?

Marcus Weber

Il Parc Adula ei ina buna idea che porscha la pusseviltad da promover la producziun e vendita da products. En discuors cun WWF e Pro Natura quantan ins anflar bunas soluziuns. Ei setracta da mussar si la pusseviltad da nezegiar la natira cun proteger il medem mument quella. Fertan ch'ins protegia la natira d'ina vart dalla val, duei ei esser pusseivel da nezegiar da l'otra vart quella pli intensivamein.

Davart dalla vischnaunca spetgan ins nuot dapli che quei ch'ei gia vegniu communicau el messadi. Igl ei da menziunar ch'il resort vegn a pagar las taxas sco quei che quellas

ein previdas ella lescha senza favurs. Quellas entradas vegnan a vegnir dabien alla vischnaunca. En connex cul far neiv spetgan las Penderas ina contribuziun dalla vischnaunca. Quellas investiziuns ein necessarias. Las Penderas san buca selubir in ulteriur unviern sco igl unviern actual. Pertuccont la pendera nova setracta ei tier la contribuziun dalla vischnaunca d'in emprést che vegness restituius.

Actualmein vegnan las investiziuns prefinanziadas entras la gruppa d'investurs. Las contribuziuns dalla vischnaunca genereschan da l'autra vart novas entradas entras in augment dallas plazzas da lavur, cun novas entradas sil sectur dallas taxas turisticas grazia ad in augment dil svilup turistic.

Il resort vegn realisau independentamein da tuttas investiziuns. Las Penderas ein avisadas allas pernottaziuns che vegnan generadas sin fundament dil resort niev. Il resort viva denton buca mo digl unviern, il resort ei era avisau al turissem la stad. Quell'investiziun porta era al rest dalla Surselva ina migliur, dil remiment ina dallas bialas vals en Svizra che nus nezegein memia pauc.

President dil cussegl da vischnaunca

Engrazia a Marcus Weber per las informaziuns detagliadas e pils sclariments.

Cussegl da vischnaunca Disentis/Mustér

Il president:

Igl actuar:

Livio Zanetti

Ervin Maissen



2. Projects communals: Informaziun prioritaziun e finanziaziun

Suprastonza communal

Il cussegl da vischnaunca ei vegnius informaus davart **la prioritaziun e finanziaziun dils projects communals** en connex cul program d'investiziun pils proxims sis onns. Totalmein ei previu d'investar enteifer quei temps bunamein 24 milliuns francs. Suenter haver risguardau las entradas da rodund 7 milliuns francs restan investiziuns nettas da 17 milliuns francs. Las grondas investiziuns pertuccan la sanaziun dalla casa da scola, la sanaziun dil Center da sport e cultura, l'illuminaziun publica, vias communalas, la sanaziun dalla canalisaziun e sereneras, il rempar Val Acletta e la meglieraziun funsila. Ils instituts bancars locals ein prompts da finanzia las investiziuns, quei era en mira alla funcziun da nossa vischnaunca sco center regiunal ed a vesta dils projects turistics previ. Tier mintga singul project vegn la finanziaziun sclarida precedent alla decisiun dall'istanza cumpetenta. Il cussegl da vischnaunca vegn informaus ils 10 da zercladur 2016 en detagl a caschun dalla tractaziun dil plan da finanzas.

Ils instituts bancars sil plaz dalla vischnaunca da Mustér han mess en mira la finanziaziun d'investiziuns da rodund 20 milliuns francs enteifer la perioda da planisaziun dallas investiziuns. Cundiziun ei che buca mo in institut bancar separticipescha vid tut las investiziuns. In institut bancar ha gia garantiu en in contract in credit da rama dad 11 milliuns francs cun la resalva che l'otra mesadad vegni finanziaada entras auters instituts. La premissa ei ch'il quen annual siara era el futur cun in surpli entradas ni excepziunalmein negativ, denton sto il capital agen esser positivs. Era dueien las amortisaziuns futuras buca crescher taluisa, ch'ellas effectueschan in surpli expensas.

La suprastonza communal ha fixau las prioritads sco suonda:

Project	Status	Volumen	Cussegl	Pievel	Execuziun
Sanaziun casa da scola nova	Elaborau preproject (credit projectaziun frs. 450'000.--)	ca. 3.5 milliuns francs	2016	2017	2017
Center da sport e cultura	Elaborau preproject	ca. 2 milliuns francs per sanaziun	2017	2017	2018
Illuminaziun publica	Credit	frs. 495'0000.--	11-03-2016	Referendum facultativ	2016 - 2017
Vias communalas	Divers projects	netto ca. 2 milliuns francs	Mintga project singul		2016 - 2021
Canalisaziun/serenera	Sanaziun serenera Raveras Sereneras Cavardiras/Pardomat Canalisaziun	netto ca. 3 milliuns francs	Mintga project singul		2016 - 2021
Rempar Val Acletta	Credit per projectaziun	frs. 160'000.-- Sanaziun ca.2.5 milliuns francs	19-08-2016	25-09-2016	2016 - 2017
Meglieraziun funsila	Cantun/confederaziun (decisiun 2./3.2015)	30 milliuns francs brutto (cumpart vischnaunca ca. 4.5 milliuns francs)	26-02-2016	24-04-2016	2017 - 2047
Vias forestalas	Elaboraziun project Via forestala Run Ulteriuras vias forestalas	ca. 13 milliuns francs, cumpart vischnaunca ca. 4 milliuns francs	2018	2018	2020 - 2030

Discussiun

Cussegl da vischnaunca

Ella survesta mauncan las investiziuns en vias communalas e las investiziuns che sedattan en connex cun las mesiras encunter aua gronda. Co stat ei cun las investiziuns decididas aunc en realisaziun, ein quellas summas previdas enzanua? Co stat ei cun la contribuziun da frs. 1'000'000.-- ch'ei vegnida empermissa alla Claustra? La survesta ei en quei senn da cumpletar cun las posiziuns che mauncan.

Suprastonza communalala

Aschibein las vias sco era las investiziuns en connex cun mesiras encunter donns da malaura ein cuntenidas ella survesta.

Tier investiziuns decididas sepresenta la situaziun sco suonda:

- Tiel CSC ei il credit pil project cumplessiv aunc pendants.
- Tier la Via Lucmagn ei aunc aviart la summa da frs. 100'000.-- per lavurs che vegnan finidas uonn.
- Tier la Via Sogn Gions ei era aunc aviart rodund frs. 100'000.-- en connex cun la cuvrida fina.
- Il project per l'Ovra electrica Val Acletta ei vegnius sistius.
- La contribuziun alla Claustra figurescha buca sin quella gliesta, perquei che quei credit ei gia vegnius concedius.

Sin la gliesta da priorisaziun figureschan ils credits gia concedi buca.

Cussegl da vischnaunca Disentis/Mustér

Il president:

Igl actuar:

Livio Zanetti

Ervin Maissen



3. Revisiun parziala dalla lescha davart igl allontanament e la purificaziun dallas auas e dil regulativ da taxas (messadi nr. 39-2013/2016)

Suprastonza communal

President communal Francestg Cajacob presenta la fatschenta en num dalla suprastonza communal ed a basa dil messadi nr. 39. La finanziaziun speciala pigl allontanament e la purificaziun dallas auas gauda ina liunga historia. Naven dall'entschatta ha la vischnaunca tralasciau d'incassar ils mieds finansials necessaris per finanziaziun las investiziuns ed ils stabiliments da quei menaschi. Consequentamein eis ei stau necessari da duvra las entradas ord las taxas da colligiazion per finanziaziun il menaschi ed il manteniment dalla canalisaziun e dalla serenera. En ina decisiun empau fasierlia ha la dertgira federala, en connex cul project per la sanaziun dalla serenera, reduciu las taxas da colligiazion per la serenera dad 1.2% sin 0.85%. Quella decisiun ha contribuuiu leutier che la sparta dalla canalisaziun e serenera ei sutfinanziada e ch'ei basegna urgentamein in'adattaziun dallas taxas annualas.

Debatta d'entrada

Cussegl da vischnaunca

El messadi havein nus saviu leger la secunda gada las medemas explicaziuns en connex cun las taxas. La differenza ei ch'il cusseglader giuridic constatescha che la relaziun denter la taxa fundamentala e la taxa da consum astgi buca survargar la relaziun da 75% tier 25%. Igl atun haveva ei aunc giu num ch'ina relaziun da 80% tier 20% seigi pusseivla. Cheu survegn ins dubis davart la qualitat dil messadi.

En connex cun la tractaziun dall'analisa da finanzas ha la majoriad dil cussegl da vischnaunca susteniu la revisiun parziala dalla lescha davart igl allontanament e la purificaziun dallas auas ed il regulativ da taxas. Schegie ch'il cussegl ha susteniu lu l'adattaziun dallas taxas, caschuna quei alzament novs quitaus a vesta ch'ei para che vischinas e vischins vegnan constrenschi adina puspei cun novs pagaments.

Suprastonza communal

Igl atun ein ins sebasaus sin las explicaziuns dil cauemploiau digl uffeci cantunal, tenor il qual la relaziun 80% tier 20% fuss stada pusseivla. La consultaziun tiel cusseglader giuridic dalla vischnaunca ha denton mussau che la relaziun dalla taxa fundamentala astga buca survargar 75%.

Tgei alternativa sa il cussegl da vischnaunca presentar? Laorsch denter entradas e deivets sesarva ad in sesarver. Igl alzament proponiu ei mudests. L'urgenza ei dada e la motivaziun per in augment dallas entradas ei buca semidada, consequentamein basegna ei buca in niev messadi. Sche nus fagein buca ina remadura vegnan ils nuvs a vegnir baul ni tard el petgen. Ei sa buca esser che nus surschein la finanziaziun a quels che vegnan suenter nus. Proximamein vegn il cussegl da vischnaunca a stuer decider davart novs projects pigl allontanament e la purificaziun dallas auas, sco la serenera da Cavardiras e da Pardomat.

Cussegl da vischnaunca

Tuttina fa igl augment dallas taxas mal, malgrad che la motivaziun ei dada e la purschida persuerter constat.

Ins sedamonda pertgei che la suprastanza communal resp. la grappa da lavur han buca gia sclariu la damonda davart la relaziun denter la taxa fundamentala e la taxa da consum igl atun vargau e pertgei ch'ins vegn pér ussa cun quellas midadas.

Contas gadas ei la cumissiun sentupada per tractar la fatschenta?

Suprastanza communal

Era la suprastanza communal desistess pli bugen da quei augment dallas taxas. Tuttina eis ei da constatar che la vischnaunca da Breil incassescha il dubel dallas taxas annualas enviers la vischnaunca da Mustér. Consequentamein ei igl augment dallas taxas buca exageraus. Igl augment dallas taxas ha stuiu vegnir sclarius cul surveglader da prezis che ha saviu s'accordar cugl augment previu. Ordlunder ei semussau la necessitad da sclarir la relaziun dallas taxas cul cusseglader giuridic che recamonda, sin fundament dalla pratica dallas dertgiras, ina relaziun maximala da 75% per la taxa fundamentala e minimalmein 25% per la taxa da consum.

La cumissiun ha salvau en tut 5 sedutas. La davosa seduta ha giu liug suenter che la posiziun dil surveglader da prezis e la posiziun dalla cusseglaziun giuridica eran avon maun. A caschun da quella seduta ha la cumissiun discussiunau la posiziun dalla cusseglaziun giuridica ed ei lu vegnida tier la conclusiun da proponer igl augment dallas taxas conform al sboz dils artechels revedi. Ils documents surluvrai ein vegni mess a disposiziun als commembers ed allas commembras dalla cumissiun per prender posiziun.

Cussegl da vischnaunca

Tuttina s'augmenta la taxa da consum enviers las ponderaziuns stadas fatgas igl atun vargau.

Sut tractanda 2 ha il cussegl da vischnaunca saviu prender investa dallas investiziuns che stattan sin rucca. Sche nus procurein buca per las entradas necessarias, va quei sin donn e quen dil cash-flow dalla vischnaunca ed en disfavour dallas investiziuns necessarias. Nus stuein investir per saver augmentar l'attractivitad dalla vischnaunca. Consequentamein eis ei necessari che las taxas pigl allontanament e la purificaziun dallas auas ston vegnir alzadas.

Cussegliaer Edgar Durschei

Propona da returnar la fatschenta alla suprastanza communal cun l'incarica da suttametter in augment dallas taxas en la fuorma sco stau decidiu ils 9 d'october 2015 cun reveder sulettamein il regulativ da taxas.

Suprastanza communal

En quei cass sto la taxa fundamentala vegnir reducida ed in augment da 50% dallas entradas sco previu ei buca pusseivels.

Decisiun

Cun 2 encunter 11 vuschs e 2 abstenziuns vegn la proposta da cussegliaer Edgar Durschei renviada.

Discussiun en detagl

Cussegl da vischnaunca

Igl ei curdau differents interessants votums. Ei setracta cheu d'ina finanziaziun speciala. Oz havein nus da pitir, per quei ch'ei vegniu tralasciau ils decennis vargai. Tgi ha profitau pli bia e tgi pli pauc. Eis ei denton buca pli sempel da pagar en ratas quei che occuora ni fa ei senn da star buns in mument per ina tezla pli gronda da plirs mellis francs? Ins sa sedumandar, schebein ei fagess buca senn d'alzar las taxas gest sin il maximum pusseivel sco quei ch'igl artechel revediu dalla lescha preveda. Cul spazi che vegn scaffius ella lescha fuss ei pusseivel d'alzar igl 1. da schaner 2017 la taxa sin consum corrispudentamein. Ston ins il medem mument quintar cun in alzament dallas taxas pil provediment d'aua?

Suprastonza communalala

Actualmein vegn fixau ella lescha sulettamein il spazi per las taxas. La suprastonza communalala ha buca l'intenziun d'alzar quellas da tala maniera gia in auter onn. Las taxas pigl allontanament e la purificaziun dallas auas stat en negina relaziun cun las taxas pil provediment d'aua. La corporaziun d'aua preveda il mument negin augment dallas taxas.

Cussegl da vischnaunca

Ei aunc adina surstaus davart la relaziun denter la taxa fundamentala e la taxa da consum.

Suprastonza communalala

Igl augment dallas taxas succeda en proporziun dalla summa prevedida pil preventiv 2016. Cun ina midada digl augment sereducess era la summa prevedida pil quen 2016

Cussegl da vischnaunca

Il cussegl da vischnaunca repassa ils artechels dalla lescha e dil regulativ senza far midadas vid il cuntegn.

Decisiun

Cun 12 encunter 3 vuschs e 0 abstenziuns decida il cussegl da vischnaunca:

1. d'approbar la revisiun d'art. 34 al. 2 ed art. 40 dalla lescha davart igl allontanament e la purificaziun dallas auas;
2. da suttametter quei conclus el senn d'art. 21, lit. b dalla costituziun communalala al referendum facultativ;
3. d'approbar la revisiun dil regulativ da taxas tier la lescha davart igl allontanament e la purificaziun dallas auas;
4. da metter sura revisiun en vigur cugl empren da schaner 2016.

Cussegl da vischnaunca Disentis/Mustér
Il president: Igl actuar:

Livio Zanetti

Ervin Maissen



Cussegl da vischnaunca 30-2013/2016
Seduta dils 11 da mars 2016

4. Remplazzament dall'illuminaziun publica: Credit (messadi nr. 40-2013/2016)

Decisiun

Suenter ch'il temps ei s'avanzaus, decida il cussegl da vischnaunca cun 12 encunter 3 vuschs da remetter la tractaziun da quella fatschenta sin la proxima seduta.

Cussegl da vischnaunca Disentis/Mustér
Il president: Igl actuar:

Livio Zanetti

Ervin Maissen



Cussegl da vischnaunca 30-2013/2016
Seduta dils 11 da mars 2016

5. Ura da damondas (conform ad art. 44 dil regulativ da fatschentas)

Suprastonza communal

Alla suprastonza communal ei vegniu inoltrau suandontas damondas a scret:

Cusseglie Wendelin Jacomet

1. "Dapi il meins december 2014 sundel jeu en contact cun signur Jürg Gartmann dalla secziun da coordinaziun FBU 32 da Cuera. Signur Gartmann coordinescha tut ils cuors da repetiziun dil militar pil cantun Grischun. Ils davos dus cuors da repetiziun previ a Mustér han muort collisiun da termin stuiu vegnir annullai. Ils termins pils cuors da repetiziun ein pli u meins fixai. Ins sa pil pli buca ordavon tgei diember da schuldada che separticipescha la finala a quels. Perquei eis ei grev da reservar las localitads provisoriamain ni da coordinar quels. Vegness l'armada a Mustér, lu vegn sulettamein il CSC en damonda sco dimora. Fuss ei pusseivel da coordinar per la part civila l'occupaziun culs camps da vacanzas en vischnaunca? Per persunas che s'interesseschan il medem mument da vegnir a Mustér per ina u l'otra occurrenza fuss ei da far tut sforz per anflar ina sligiazion.
2. Dalla populaziun vegn ei adina puspei menziunau ch'ei fuss pli che urgent da remplazzar las measas e suppias ellas hallas sco era ella sala Fontauna. El preventiv 2016 (detagl) ei previu ina summa per ina investiziun en mobiliar (meisas e suppias). Con lunsch essas cun quella fatschenta?
3. Con lunsch ein las preparativas pil project cumplessiv ed il plan da finanziaziun progredadas?"

Gerau Roger Tuor, president cumissiun da menaschi CSC

1. "Dapi onns sestentein nus ch'il militar retuorni anavos el CSC, da niev era en collaboraziun cun cusseglier Wendelin Jacomet. Adina puspei ha il CSC giu contact cun signur Jürg Gartmann. Il fevrer 2016 han Wendelin Jacomet e sunter Jürg Gartmann preannunziu pigl onn 2018 quater jamnas d'occupaziun el CSC entras il militar, mintgamai il fevrer, matg ed october. Deplorablamein ei il diember dalla schuldada buca fix. Pil temps giavischaus entras il militar ein ils stabiliments gia reservai cun camps che visetan gia dapi 4 onns e daplil CSC. Il meinafatschenta ha contactau la davosa gada ils 24 da fevrer Jürg Gartmann telefonicamein per sclarir sch'il militar sappi stuschar ils survetschs e s'adattar al CSC e schebein in'occupaziun regulara ils proxims 5-10 onns durant il medem temps seigi garantius. Actualmeins vegn quella damonda sclarida davart il militar. Da quei da 16-18 camps da vacanzas fussen pertuccai d'ina decisiun en favur dil militar. Quels camps visetan nus dapi 4-8 onns ed han gia signalisau da restar ils proxims onns fideivels, per exempel era la Showband. Contacts per saver stuschar quels camps civils han per part giu liug. Stuschar quels termins ei denton buca pusseivel, perquei che quels sedrezzan tenor il temps da vacanzas dallas scolas. Il Center da sport e cultura enquera adina puspei pusseivladads per optimar, cunzun sil secur dils camps. Igl onn 2015 ei pertuccont camps buca staus in aschi bien onn, persunter sepresenta igl onn 2016 fetg bein, gest era cun optimar il menaschi. Buca adina anflan quell'optimaziun la megliera accoglientescha tier ils pertuccai.

Sche nus dein tuttina suatientscha al militar, stuein nus tenor il meinafatschenta CSC quintar en quell'12 jamnas mo tier ils stabiliments cun ina sperdita d'entochen frs. 80'000.--. La sviulta ella cafetaria fuss secapescha per quell'12 jamnas empau megliera. La cumissiun da menaschi ha en sia seduta dils 9 da mars decidu unanimamein da favorisar era el futur ils camps civils.

2. Las measas e suppias ein dapi biars onns en in schliet stan, la davosa gada han ins viu quei dalla sera da tscheiver. L'offerta pil remplazzament ei sin meisa. La fatschenta vegn tractada en in dils proxims dus cussegls, gest sco l'agenda lubescha. La cumissiun da menaschi favorisescha il termin dils 22 d'avrel 2016. La damonda vegn fatga il medem mument cun la damonda per la sanaziun urgenta dalla fatschada vest dalla halla plurivalenta. Il preventiv 2016 preveda per measas e suppias la summa da frs. 250'000.--. Tenor l'offerta avon maun vegn la summa prevedida observada. Las suppias e measas han in temps da furniziun da 6-8 jamnas e 5 onns garanzia.

Las cefras per la sanaziun dalla fatschada ein dapi ils 7 da mars 2016 enonuschentas. Ins ha elaborau duas variantas. La varianta favoreivla preveda cuosts da frs. 200'000.--, la cara cuosts da frs. 280'000.--.

Plinavon cuntegn il preventiv 2016 frs. 55'000.-- per l'illuminaziun dalla halla da sport e frs. 185'000.-- pil project cumplessiv ed il plan da finanziaziun per las investziuns el CSC.

3. Gl'empren workshop cun la gruppa preparatoria ed ils collaboraturs dalla firma "Erlebnisplan", incumbensada cun l'incarica da sviluppar il studi davart la purschida dil CSC, ha giu liug ils 29 da schaner 2016. A basa da quei luvraturs ei vegniu fatg supplementarmein ina retschera tier la populaziun, hosps dil CSC e possessurs da secundas habitaziuns. Varga 400 persunas ein separticipadas, era quellas rispostas vegnan risguardadas. Ils 6 d'avrel 2016 ha liug il secund workshop. La lavur dad Erlebnisplan cun la gruppa accumpignonta vegn ad esser finida questa stad. La priorisaziun dils projects communal haveis Vus viu a caschun dalla tractanda 2. La realisaziun dallas investziuns pil CSC ein previdas pils onns 2017-2018. La fatschenta vegn avon cussegl la fin 2016 ni l'entschatta 2017. Damai che las investziuns el CSC s'entardan entras la priorisaziun dallas investziuns communalas, sun jeu persunalmein dil meini da schar decider la nova cumissiun da menaschi CSC en caussa."

President dil cussegl da vischnaunca

La proxima seduta dil cussegl da vischnaunca ha liug venderdis, ils 22 d'avrel 2016 allas 20¹⁵.

El menziunescha aunc entginas occurrenzas che han liug il proxim temps.

Pendenzas

Fatschenta/Sparta	Termin	Responsabel	Remarcas
Priorisaziun dallas investiziuns, gliesta	Ils 11 da mars 2016	Suprastonza communal	Liquidau ils 11 da mars 2016
Informaziun dalla populaziun davart la politica da tgira	Ils 24 d'avrel 2015	Gerava Cecilia Maissen	
Survesta davart ils cuosts en connex culs donns d'uaul. Risposta el decurs dil meins d'avrel 2016.	Ils 21 d'uost 2015 Ils 9 d'october 2015 Ils 20 da november 2015 Fin mars 2016	President communal Gerava Cecilia Maissen	

Cussegl da vischnaunca Disentis/Mustér
Il president: Igl actuar:

Livio Zanetti

Ervin Maissen

Disentis/Mustér, ils 20 da mars 2016

G:\Uffeci\baghegiar\Cussegl da vischnaunca\Cussegl da vischnaunca 2013_16\Protocols\Cus0016_30 1-EM-cumpl.docx